



Siaran Akhbar Ini Diembargo
4.00ptg, Sabtu, 3 September 2016

UCAPAN DIBERIKAN DALAM BAHASA MELAYU DAN INGGERIS

UCAPAN CIK RAHAYU MAHZAM, MP JURONG GRC, AHLI MAJLIS BAHASA MELAYU SINGAPURA DAN PENERUSI JAWATANKUASA BULAN BAHASA 2016, DI MAJLIS PELANCARAN BULAN BAHASA 2016, SABTU, 3 SEPTEMBER, DI MUZIUM NEGARA SINGAPURA

[UCAPAN BERMULA DALAM BAHASA MELAYU]

Tetamu Terhormat

Encik Ng Chee Meng, Pemangku Menteri Pendidikan (Sekolah) merangkap Menteri Negara Kanan, Kementerian Pengangkutan

Encik Masagos Zulkifli, Menteri Sekitaran dan Sumber Air

Profesor Madya Dr Muhammad Faishal Ibrahim, Pengerusi Majlis Bahasa Melayu Singapura

Rakan sekerja Parlimen

Para tamu yang dihormati

Tuan-tuan dan Puan-puan sekalian

Selamat datang ke Majlis Pelancaran Bulan Bahasa 2016.

1. Terima kasih kerana sudi meluangkan masa untuk menyemarakkan acara hari ini.
2. Bagi mereka yang tidak dapat menyertai kami di glass atrium ini, Berita Mediacorp sedang merakamkan majlis ini supaya mereka dapat turut serta meraikan pelancaran Bulan Bahasa melalui wadah berita.sg.
3. Kita berkumpul petang ini untuk sama-sama meraikan dan menjayakan pelancaran Bulan Bahasa 2016.



4. Pada masa yang sama, saya rasa kita perlu mengenang tokoh-tokoh yang telah memberi sumbangan besar kepada masyarakat kita.
5. Kita baru sahaja kehilangan seorang tokoh dan mantan Presiden Negara, mendiang Encik S.R. Nathan. Mendiang Presiden kita dikenali sebagai seorang yang mesra dan mudah didekati. Beliau juga ketua yang sangat berpengetahuan dan banyak mendorong orang ramai agar tabah untuk mengharungi apa-apa sahaja rintangan.
6. Mendiang Encik S.R. Nathan dihargai sebagai seorang yang berbakti kepada negara dan akan sentiasa diingati atas keprihatinannya terutama sekali tentang kemajuan dan perkembangan masyarakat Melayu/Islam setempat. Mendiang Perdana Menteri Pengasas Encik Lee Kuan Yew mengatakan bahawa mendiang Encik S.R. Nathan tidak pernah menolak apabila khidmatnya diperlukan, tanpa mengira waktu. Banyak sekali pengajaran dan nilai yang boleh kita pelajari daripada mendiang dan jasa beliau akan sentiasa dikenang.
7. Dalam masyarakat Melayu, kita juga telah mengalami kehilangan yang besar. Tahun lepas, ketika negara kita meraikan SG50, guru yang amat kita hormati, Allahyarham Cikgu Mohd Naim Daipi, telah meninggalkan kita.
8. Tahun ini, kita telah kehilangan tokoh-tokoh bahasa dan sastera, Allahyarham Cikgu Muhammad Ariff Ahmad, Cikgu Aliman Hassan dan Dr Liaw Yock Fang.
9. Dengan perginya tokoh-tokoh Bahasa, sastera dan budaya tadi, tanggungjawab untuk memastikan bahasa Melayu terus digunakan dan dicintai berada dalam tangan generasi yang seterusnya. Saya bersyukur, masyarakat kita masih mendapat panduan dan dorongan daripada pemimpin dan tokoh-tokoh lain seperti Menteri kita, Encik Masagos Zulkifli, Profesor Madya Dr Hadijah Rahmat, Pak Suratman Markasan, Cikgu Yusnor Ef dan ramai lagi.
10. Usaha untuk memupuk generasi pelapis perlu diteruskan dan rasa cinta kepada Bahasa Melayu harus terus dipupuk kepada segenap masyarakat. Tanggungjawab ini perlu digalas bukan sahaja oleh pemimpin dan tokoh-tokoh bahasa, tetapi oleh semua pihak, termasuk pendidik, ibu bapa dan para pelajar.



11. Saya pasti, tanggungjawab ini juga dirasai oleh semua Duta Bahasa kita dan hari ini kami menyambut tiga orang lagi Duta Bahasa ke dalam keluarga kami. Sebagai wakil duta-duta Bahasa yang ada, saya ucapkan selamat datang kepada Siti Khalijah, Megat Muhammad Firdaus dan Ustazah Nurul 'Izzah Khamsani.
12. Hadirin sekalian, jawatankuasa Bulan Bahasa sedar bahawa usaha untuk mengekalkan dan menghidupkan bahasa kita perlu dimulakan daripada usia muda. Maka, kita juga mengajak Rakan Bahasa menyertai usaha murni ini. Saya amat teruja dengan semangat 118 Rakan Bahasa daripada 60 buah sekolah yang telah dilantik pada bulan Mei lalu. Mereka telah bekerja keras dan mengikuti perjalanan kami untuk menjayakan Bulan Bahasa dengan tekun.
13. Hari ini, ramai antara rakan Bahasa kita yang telah dilantik itu akan membawa pengunjung melalui pameran-pameran di Galeri Sejarah. Rasanya, sudah tidak sabar lagi untuk menikmati keindahan bahasa Melayu melalui cerita-cerita yang akan disampaikan oleh mereka nanti.
14. Hadirin, melalui bahasa, kita dapat mengikat tali persaudaraan dan kenal dengan lebih mendalam akar, nilai, warisan, budaya dan mengekalkannya untuk golongan muda dan generasi-generasi yang seterusnya.
15. Menerajui inisiatif yang penting dalam usaha untuk menggalakkan penggunaan bahasa Melayu ini, merupakan satu tugas yang besar. Saya amat berterima kasih kepada Prof Madya Dr Muhammad Faishal Ibrahim dan Majlis Bahasa Melayu Singapura, kerana memberikan peluang dan mengamanahkan Bulan Bahasa kepada saya.
16. Mantan Pengerusi Bulan Bahasa, yang menjadi pengerusi buat tiga tahun berturut-turut sebelum ini, Encik Zaqy Mohd, bercita-cita tinggi. Atas kerja keras beliau selama ini, Bulan Bahasa kini mempunyai asas yang kukuh. Saya amat berterima kasih kerana beliau masih lagi memberi sokongan yang kuat dan panduan yang berguna.
17. Pada tahun ini, semasa saya mengetuai Bulan Bahasa sebagai pengerusi buat pertama kali, saya teruja dan terasa bersemangat kerana bakat, idea dan usaha yang saya lihat dalam kalangan rakan-rakan kerjasama dan masyarakat dalam usaha untuk memastikan Bahasa Ibunda kita terus kekal sebagai Bahasa Ilmu, Bahasa Budaya dan Bahasa Mesra.



18. Saya juga ingin mengucapkan setinggi-tinggi penghargaan kepada semua ahli-ahli Jawatankuasa Bulan Bahasa dan juga anggota-anggota Majlis Bahasa, seperti Puan Julina Khusaini dan Cikgu Tajudin Jaffar, atas sokongan yang tidak pernah putus. Tanpa mereka semua, tidak mungkin Bulan Bahasa dapat dijayakan dengan baik sekali.
19. Hadirin sekalian, izinkan saya meneruskan ucapan saya dalam bahasa Inggeris.

[UCAPAN DITERUSKAN DALAM BAHASA INGGERIS]

20. Tuan-tuan dan puan-puan sekalian, saya amat berbesar hati untuk mengumumkan bahawa terdapat lebih daripada 50 rakan kerjasama telah menyediakan lebih daripada 100 program tahun ini. Program-program ini memberikan peluang kepada pelbagai golongan masyarakat untuk menikmati Bahasa Melayu sebagai bahasa yang indah dan dinamik.
21. Saya gembira dengan adanya golongan muda dan rakan kerjasama baharu seperti Haz Workz, Big Tree Pictures dan Nusantara Arts yang menganjurkan program-program menarik untuk masyarakat. Melalui mereka, kita dapat melihat bagaimana bahasa Melayu terus kekal relevan dan dinamik dalam masyarakat sekarang yang kian maju dan berubah.
22. Usaha-usaha khas juga telah dibuat agar teman-teman kita yang tidak bertutur bahasa Melayu juga mampu menghargai bahasa dan budaya Melayu. Hujung minggu ini, marilah luangkan masa bersama Rakan Bahasa di Galeri Sejarah Singapura untuk mengikuti lawatan panduan istimewa mereka. Kamu juga boleh menyertai program Rentak Kita!, sebuah pementasan orkestra tradisional Melayu yang dijalankan dengan sesi-sesi perkongsian di dalam bahasa Inggeris dan Melayu. Program ini dikendalikan oleh Orkestra Sri Temasek yang ditubuhkan oleh Megat dan Afi Hanafi.
23. Selain masyarakat Tampines, Chua Chu Kang, Nee Soon dan Jurong yang telah menjayakan edisi Bulan Bahasa mereka tersendiri buat beberapa tahun ini, saya juga berbesar hati untuk mengumumkan bahawa Sembawang akan turut menyertai perayaan tahun ini dengan menganjurkan acara Bulan Bahasa di kawasannya. Saya percaya perayaan di estet-estet perumahan seperti ini merupakan wadah yang baik buat teman-teman kita yang bukan dari kaum Melayu untuk bersama-sama menikmati dan meraikan Bahasa Kebangsaan kita. Saya juga ingin mengucapkan terima kasih kepada semua Penasihat Akar Umbi atas sokongan mereka terhadap aktiviti-aktiviti dan acara-acara Bulan Bahasa yang diadakan di kawasan-



kawasan mereka. Segolongan antara mereka bersama kita pada hari ini, termasuklah Encik Zainal Sapari dan Dr Tan Wu Meng. Terima kasih atas kehadiran dan sokongan kamu.

24. Kami amat beruntung kerana menerima sokongan hebat daripada pihak-pihak Lee Foundation, MUIS, Encik Mohamed Abdul Jaleel daripada syarikat MES, Toteboard, Comfort Delgro, Moo-O dan Second Chance. Bagi pihak Majlis Bahasa Melayu Singapura dan Bulan Bahasa, kami amat menghargai sokongan anda dan sokongan yang diberikan akan berterusan.
25. Akhir sekali, saya juga ingin mengambil kesempatan ini untuk mengucapkan setinggi-tinggi terima kasih kepada pihak Muzium Negara Singapura yang sudi berkongsi ruang bersama kita, dan juga kepada semua para hadirin dan peserta Bulan Bahasa tahun ini.
26. Saya ingin mengiktirafkan usaha Jawatankuasa Pembelajaran dan Penggalakan Penggunaan Bahasa Melayu (MLLPC). Kejayaan kerjasama dengan jawatankuasa ini telah membenarkan kami untuk menyajikan pelbagai program untuk masyarakat. Terima kasih atas sokongan anda selama ini.
27. Sekalung budi juga saya ucapkan kepada pasukan sekretariat Majlis Bahasa daripada Lembaga Warisan Negara, NHB yang diketuai oleh Puan Trudy Loh. Saya amat gembira dapat bekerja bersama mereka dan tanpa kerja keras mereka dan penyelarasan mereka, acara ini tidak mungkin acara ini dapat dijayakan.
28. Kepada semua yang hadir pada hari ini, terima kasih.

[UCAPAN DIAKHIRI DALAM BAHASA MELAYU]

29. Hadirin sekalian, seperti yang terkandung dalam pantun pusaka kita: Yang kurik itu kundi, Yang merah itu saga; Yang baik itu budi, Yang indah itu bahasa, sama-samalah kita menjayakan Bulan Bahasa 2016 agar terlestari cantik budi, indah seninya bahasa Ilmu, Budaya dan Mesranya bahasa Melayu kita.
30. Terima Kasih.